

否泰錄
北使錄
正統臨戎錄

北征事蹟
正統北狩事蹟



卷之四
目錄
卷之五
目錄

卷之六
目錄
卷之七
目錄
卷之八
目錄



2545

否

泰

錄

劉定之 著

中華書局

叢書集成初編所選歷
代小史及紀錄彙編皆
收有此書紀錄本較佳
故據以影印

紀錄彙編卷之十六

否泰錄

劉定之

昔我太祖高皇帝膺受天命驅逐胡元遯歸朔漠其末帝妥懽帖木兒旣殂太祖以其嘗君臨華夏也謚爲順帝可謂盛德至仁矣順之遺胤據其故穴仍君長其醜類世數莫考惟知其地名瓦剌其君立於宣宗皇帝時者名普花此稱爲可汗而彼自稱不可知計必仍僭其先世大號也故其臣亦悉用故時將相稱號豈非羊質虎皮驚翰鳳鳴者哉稱丞

相者二人一曰和寧王阿魯台一曰順寧王脫懽常遣使朝貢朝廷賜以詔書亦稱之曰王其後二人相繼死而脫懽之子曰也先悉有二人部屬其號爲太師君臣異處常不相見普花娶也先妹以相固結今皇帝卽位以來也先每年冬遣人貢馬朝廷厚答金帛過元旦郊祀始去然久之漸桀驁不恭往來通使等變詐翻覆告以中國虛實也先求以其子結嫺於帝室通使皆私許也先進馬爲聘儀朝廷不知也答詔無許姻意也先愧怒以正統十四年七月初八日入寇塞外城堡多陷沒邊報日至遣駙

馬都尉井源等四將各率兵萬人出禦之源等旣行
司禮監太監王振復勸上親征命太師英國公張
輔太保成國公朱勇等治兵明臣奏疏請留不允十
七日駕行命郕王居守每旦於闕左門西面受
羣臣謁見朝政皆太監金英吏部尚書王直學士高
穀駙馬焦敬等共議其從駕行者尚書王佐鄺埜學
士曹鼐等官軍私屬共五十餘萬人出居庸關抵宣
府井源敗報踵至上至大同驀有黑雲如傘罩營
雷電如雨王振惡之乃以駕還八月十三日至狼
山虜追及遣朱勇等三萬騎逆戰皆敗死無隻騎回

是日 駕至土木日尚未晡去懷來城僅二十里欲
入保懷來城振輜重千餘輜在後未至留待之遂駐
土木旁無水泉又當虜衝十四日欲行虜已逼不敢
動兵士束手饑渴十五日虜使持書來以求和爲言
召曹鼐草勅與和遣二通事與虜使偕去遂移營踰
塹以行迴旋之間行列已亂爭先奔迸勢莫能止虜
騎蹂陣而入奮長矛以擊我軍大呼解甲投刃者不
殺衆裸袒相蹈藉死蔽野塞川虜叢入中軍宦侍虎
賁矢被體如蝟 上與親兵乘馬突圍不得出虜擁
以去文武軍吏幸免者蓬首赤身踰山谷連日饑餓

得達關虜舉我輜重惟取金銀珠寶貴細者其實虜
衆僅二萬我師死傷過半矣十六日 上在虜營手
書遣使與懷來守將言被留且索金帛懷來城閉不
可入絕而登復遣人送至 京師以其夜三鼓從西
長安門入報十七日百官集 闕下頗聞敗報私相
告語愁嘆驚懼出至紫陌見軍士奔歸瘡殘被體血
汗狼藉然尚未知 上所在也是日午遣使齎黃金
珠玉衮龍段疋等物馱以八馬詣也先營請還 車
駕十八日 皇太后召百官入集 闕下 命郕王
權總萬幾於午門南面見百官始啓事奉令旨施行

衆皆謂行且卽真矣數日內外洶洶不自保已而
皇太后詔天下立皇子見深爲皇太子又數日
尚書于謙等彈奏奸臣王振傾危宗社歷數其罪
千言讀旣畢王諭以自有處置謙等言振罪惡滔
天今日不正典刑滅其族臣等皆死于此不但已也
因痛哭聲徹中外王起入內中使將闔門衆擁謙
等隨入太監金英傳令旨且退衆奮欲捽英英懼
言令藉沒振遣指揮馬順往衆曰順奸臣黨也宜遣
都御史陳鑑英脫身入順前勸解辭色稍遽給事中
王竑捽順首衆爭毆之蹙踏捨裂項刻而斃或就脫

順靴擊出其眼血流門闌衆皆愈怒求內使王毛等
二人英使人掉出亦擊殺之曳三屍陳于東長安門
軍士猶爭擊不已陳鎰奉 令旨率軍藉振宅并其
黨彭得清內使陳管家等項之執振姪錦永衛指
揮王山至跪于庭共唾罵之乃宣 令旨獎諭百
官各歸蒞事拜謝而出明旦移 邸王坐于奉 天
門左受朝由此卽真之議益急振宅在宮城內外凡
數處皆重簷遂閣僭擬 宸居器服綺麗尚方不逮
玉盤徑尺者十而珊瑚樹高六七尺者五七株金銀
十餘庫馬數萬匹衛王山于市其族無少長皆斬山

弟林亦爲錦衣衛指揮從振死于虜林兇悍尤甚姬妾百數二十二日虜擁上至大同城門閉校尉袁彬隨侍以頭觸門大叫於是廣寧伯劉安給事中孫祥知府霍瑄出見獻蟒龍袍上以賜知院伯顏帖木兒及也先弟大同王賽刊王上曰秋稼未收軍士久饑可令刈以入城又曰虜欲歸我情僞難測宜嚴爲備安等獻酒上酹地飲訖虜令括城中犒軍并內官郭敬等金銀共二萬餘兩來迎駕旣獻虜笑不應二十三日上索西瓜雪梨割與虜食訖遂去過貓兒莊九十九海子又行見蘇武廟李陵碑二

十八日至黑松林也先營在焉 上入營坐也先拜稽首乃侍坐宰馬設宴出其妻妾四人以次奉 上酒歌舞以爲娛其後遂奉 上居于伯顏帖木兒營去也先營十餘里伯顏帖木兒與其妻見 上亦如也先禮伯顏帖木兒每二日獻羊七日獻牛也先每七日獻馬二人者每出獵則又以其所獲野馬黃羊之類來獻二十九日 皇太后命邸王早正大位以安天下有司擇日行禮衆遂相率詣文華殿門請王出見 王辭讓不允衆共言 祖宗神器不可虛聖母有命不可違有旨從請乃再拜山呼而出九

月初也先遣其酋長尚書來言欲送 上還京入見
賜以冠帶綵段臨行以金百兩銀二百兩綵段若干
疋賜也先初六日 王卽皇帝位遙尊 上爲太上
皇大赦天下百官六軍賞賜有差後數日也先復遣
使至書詞悖慢 朝廷復書大畧言中國已立 皇
帝天下兵甲衆盛可相抗禦之意已而命羅通孫祥
爲副都御史守居庸紫荆關石亨爲武清伯總攝京
師兵馬十月初也先入寇自紫荆關入殺指揮韓清
等孫祥走死初九日虜至京師城西北關外石亨營
于城北兵部尚書于謙督其軍都督孫堂營于城西

刑部侍郎江淵叅其軍交趾舊將王通爲都督鴻臚寺卿楊善爲副都御史守城虜攻城連日抄掠亨等與之殺傷相當其酋長鐵元帥死焉時畿內降附胡人留居者多乘時爲寇朝廷重賞購捕被獲者累日不絕虜稍沮復遣使言欲和十七日以通政司叅議王福爲禮部侍郎中書舍人趙榮爲鴻臚寺卿持羊酒往也先營也先與其弟及伯顏帖木兒擐甲胄厲弓矢太上帶刀引福等前露刃夾之福等拜訖也先揮却羊酒取勅視番字太上取勅視漢字也先謂福等尔小官可令胡漢子謙王直搦等來

福辭歸時四方兵漸集虜夜遁從居庸關出遺所掠牛羊人口于路以緩追兵 太自上紫荊關出乘馬踏雪而行遇險則袁彬執鞚旣入虜境也先來見宰馬拔刀割肉燎以進云勿憂終當送還食訖辭去十九日瓦剌可汗普花遣使獻馬先是普花駐兵關外未入至是以尋舊約通和爲言 朝廷以其來緩師却之胡濙王直言普花也先君臣素不睦宜受其獻以間之從濙等言亦使人入見獻馬八匹賜衣服冠帶酒饌金帛視常年有加二十二日遣楊洪孫堂范廣等率兵二萬擊虜之未去者二十五日破虜於固

安得牛馬驢數百匹奪還人口萬餘十一月初八日
以虜旣退 京師解嚴降 詔撫安天下十一日免
朝百官望拜 太上聖節于朝天宮十三日楊洪等
旋師入見言虜衆已盡絕其實不過百餘散掠各郡
驅人畜以自擁衛望之若數萬衆官軍不敢逼其南
去者各郡以漸捕獲之其北去者洪等逐至關殲焉
猶殺官軍數百人洪子俊幾爲所殺旣奏捷以洪爲
昌平侯與副都御史羅通練兵于東教場石亨練兵
于西教場二十三日也先遣使來索大臣迎 駕約
以後月初三日至其營否且又入寇書詞甚慢不答